

La Carta a Los Gálatas

Carta Ch'ojcayaj Galacia

Nasomda'mbø Apøstol San

Pablo'is

¹ Øjchønø Pablo, øjchøn apostoles. Pero ji'n chøn pø'nis cyøpinupø, ni ji'ndyet chøn pø'nis cø'vejupø; sino Jesucristo'is cø'vejøjtzi y ndø Janda Diosis. Jic ndø Janda Dios yac visa'upø'is Cristo cuando ca'ujacam.

² Mi jajyandyamba mijtzi yø'qui jen mi ndu'mdambapø'is ø mi va'njajmonguy tøvø Galacia nasom mi ijtamupø'is. Øtz ijtamuse yø'qui mi va'njajmocuy tyøvø'is nø mi nø'vejatyam yuschi'ocuy.

³ O'nømbyøjtzi ndø janda Dios y ndø Comi Jesucristo más vøti va'cø mi ngyotzonñdamø y va'cø mi yac ijtam mas vøjø.

⁴ Yøn Cristo'is chi'ocuyaj vyin va'cø cyoca'ay ndø cojata'm y va'cø tø yaj cotzoctamø. Tø yaj cotzoc-tamu jana tø vijtam tu'mbac parejø yatzita'mbø pønji'n yøti ijnømuse nascøsi. Jetse syunu ndø Janda Diosis va'cø jetse tyucø.

⁵ ¡Ndø vøngøtzøcta' Dios ijtuse pø'nis mumu ja-macøtoya! Amén.

Ja it más eyapø Diosis 'yote jujche va'cø tø cotzoctamø

⁶ Nømaya'mbøjtzi porque prontoti nø mi ndzac-tam Dios. Aunque Diosis mi "vyejandyamu va'cø mi ngyotzoctamø Cristo'is vyø'ajcupit, y nø mi

ndzactamu. Y nø mi mbøjcøchondamu eyapø va'njajmocuy eyapø'is chambapø. Nømyajpa: Yøcse mi ngyotzoctamba. Pero ji'ndyet viyuñbø.

⁷ Pero ja it más eyapø va'njajmocuy va'cø jujche tø cotzoctamø. Pero it syunbapø'is mi nchøctocojatyam mi va'njajmonguyta'm. Cristo'is vøjpø 'yote sunba cyacpøtocojayajø.

⁸ Pero o'ca aunque i'is mi ñchajmatyamba eyapø va'njajmocuy jujche va'cø tø cotzoctamø ji'ndyet øtz mi ndzajmatyamuse, tiene que va'cø tyocoy Diosis vyi'nañdøjqui. Aunque øtz tiene que va'cø tocotyamø, aunque tzajpombø angeles tiene que va'cø tyocoya, o'ca sunba cyacpøtocojay Cristo'is vøjpø 'yote.

⁹ Oyu'am mi ndzajmatyam vi'na, jetseti mi ndzajmatyangue'tpa yøti: O'ca aunque i'is mi nchajmatyamba eyapø va'njajmocuy jujche va'cø tø cotzoctamø, ji'ndyet mi mbøjcøchondamuse; tiene que va'cø tyocoyaj Diosis vyi'nañdøjqui.

¹⁰ Muspa mi nchi'tam cuenta que ji'nø ndzam jetse va'cø ñøjayaj pø'nis que vøjpø pøn chøñø. Øtz su'nbøjtzi va'cø vøjpø pøn gotzøcø Diosis y ji'n pø'nis. O'ca sunbatøcna'n øjtzi va'cø vøjpø pøn gotzøcyaj ø mbøndøvø'is, ji'na'nø Cristo'is ñu'cscuy.

Jujche yoscho'tz Pablo Dioscø'mø

¹¹ Pero viyuñsepø tiyø mi ndzajmatyamba øjtzi, ø mi va'njajmonguy tøvø. Mi ndzajmatyamba que vøjpø ote øtz mi ndza'manvajcatyambapø, ji'ndyet pø'nis qui'pscøpo'u.

¹² Porque ji'nche pø'nis ø tzajmayupø, ni ji'nche pø'nis anmayupø, sino que Jesucristo'is yac musøjtzi.

13 Porque mi mandamu'am jujche øjtzi oyuse iti cuando va'ñjambana'ñtzi Israel pø'nis vya'ñjajmocuy. Mi mustamba'm jujche øtz maya'anse "yacsutzøcyajpana'ñtzi tu'myajpapø Dioscø'mø. Mañbana'n ø "ocyajyaje.

14 Y más suñi ndzøjcapyana'n øjtzi Israel pø'nis vya'ñjajmocuy que ji'n vøti ø ame ndøvø'is ø ngumguy tøvø'is chøjcayajese Porque øtz más suñina'n ndzøjcapya øjtzi ø mbeca jata tzu'ngu'is cyostumbre.

15 Pero Diosis cyøpi'ñøjtzi antes que pø'najøjtzi, y veja'yøjtzi porque ñe'c su'ñøjtzi.

16 Por eso cuando ñe' Diosis syunu'cyse'ñomo, entonces yaj quejay øjtzi ñe' 'Yune va'cø ngomusayø, va'cø ndzamøpucsøjtzi aunque jutpø pø'nomo. Entonces jisye'c ja mye'ndzøjtzi pøn tza'mañvajcapyapø'stzi ti vøj ndzøcø.

17 Y ni ja mya'ñøjtzi Jerusalén gumgu'yomo ityajumøna'n más vi'nata'mbø apostoles que ji'n øjtzi. Pero ma'ñøjtzi Arabia nasomo y jinø vitu'que'tøjtzi Damasco cumgu'yomo.

18 Y entonces cøjtu'cam tujtay ame o'yøjtzi Jerusalén gumgu'yomo va'cø mañ ndu'n Pedro, y yøjta jama jamacøjtøjtzi jic Pedroji'n.

19 Pero ja "isøjtzi eyata'mbø apostoles más que "isu ñe'c ndø Comi'is myuqui Jacobo.

20 Yøcse nø mi jacyjandamuse, Diosis ispa que ji'n nø sujetzu.

21 Jøsi'jcam ma'ñøjtzi Siria nasomo y Cilicia nasomo.

22 Pero Judea nasombø tu'myajpapø Cristo'is ñøyicøsi, je'is ji'na'ñø ispøcyaj øjtzi, porque ja isyajøtø'cna'n.

23 Unico myañaju que tzamdøju: Je vi'na oyu'is yacsutzøcyaje yøti chamgøpucspa va'najmocuy vi'na sunbapøna'n yajø.

24 Y vyøcotzøcyaj Dios porque jetse yaj qui'psvitu'øjtzi.

2

Eyata'mbø apostolesis pyøjcøchonyaj Pablo

1 Entonces jøsi'cam cøjtu'cam catorce ame vøco mañvøjøtzøjque't øjtzi Jerusalén gumgu'yomo Bernabéji'n, y øtz nømangue'tuti'tzi Tito.

2 Ma'nøjtzi porque yac musø Diosis que jetsena'n sunba va'cø ndzøcø. Cuando ne'ti ijta'møjtzi ndø tøvøji'n covi'najø cotzøcyajtøjupø, entonces ndza'mañvajca'yøjtzi jic vøjpø ote øtz ndzamgøpucspase eyata'mbø pø'nomo lo que ji'ndyet Israel pønda'm. Jetse ndzøjcøjtzi va'cø jana yaj ø "yosanø ndzøjcupø'tzi y mapøtø'c ndzøqui.

3 Pero ø nøndunø Tito, aunque griego pønete, ja pyenatzøcyajø va'cø syeña'øtyøjø Israel pø'nis syeñaji'n (aunque ijtuna'n jinø sunupø'is yac seña'øyajtøjø).

4 Porque jin ityajuna'n nømyajpapøte que va'najmocuy tøvøta'mete pero ji'ndyet jicta'm. Nu'mnøtøjcøyajtøju va'cø cyøque'nøjayaj jujche libre tø ijtamba Cristo Jesusji'n va'cø jana ndø tzøc jetsepø angui'mguy. Sununa'n penatzøcta'møjtzi va; cø "yaj copujtam angui'mguy jetsepø.

5 Pero ni jujche ja nchøcta'møjtzi je'is syuñajpase ni chøtøn hora. Porque o'ca ndzøctambana'n øjtzi je'is syunbase, ji'na'n mus mi va'njama'nøtyam viyuñsyepø vøjpø ote.

6 Pero pø'nis cyomo'yajupø o'ca covi'najøta'mete, je'is ja chajmayajøjtzi ni ti jomepø. Pero aunque sea covi'najø'ajø, aunque ji'n cyovi'najø'aje, øtz nømba que ji'ndyet ni tiyø. Porque mumu pøn parejote Dosis vyi'nañdøjqui.

7 Pero jic covi'najø'is ja chajmayajøjtzi ni tiyø jomepø, sino que chi'yaj cuenta que øtz tzamdzi'tøjøjtzi vøjpø ote va'cø ndzamgøpucs aunque jutipø pø'nomo, mientras Pedro tzamdzi'tøju vøjpø ote va'cø chamgøpucs Israel pø'nomo.

8 Porque cyotzonupø'is Pedro va'cø mus chamgøpucsoy vøjø Israel pø'nomo, mismo je'is cotzo'nøjtzi va'cø musø tzamgøpucsoy vøjø eyata'mbø pø'nomo.

9 Y como'yajtøjpana'n Jacobo y Pedro y Juan o'ca más covi'najøta'mete. Cuando chi'yaj cuenta je'is que Dosis cotzo'nøjtzi jetse va'cø yosa, entonces nøcø'mitzta'møjtzi Bernabeji'n va'cø myustøjø que vyø'møyaju øtz ndzøctambase. Vyø'møyaju que va'cø yosta'møjtzi aunque jujchepø pø'nomo, y ñe'c va'cø yosyajø Israel pø'nomo.

10 Único syuñaju va'cø jamda'møjtzi pobreta'mbø va'cø ngotzonçdamø, y jetse øtz de por si na sunu ndzøjqueta.

Pablo'is ñøjay Pedro que ji'n vyøj nø chøjcuse

11 Pero minu'c Pedro Antioquia cumgu'yomo, "nøja'yøjtzi pø'nis vyi'nañdøjqui que ji'na'n vyøj nø chøjcuse.

12 Porque ja miñajø'ctøc Jerusalén cumgu'yombø pøn cyø'vejyajupø Jacobo'is, cu'tpana'n Pedro ji'ndyet Israel pø'nomo. Pero cuando miñaju'cam jic pøn cyø'vejyajupø Jacobo'is,

ca'ñbø' Pedro, tzu'nø nø cyu'tupøji'n. Jetse chøjcu porque ña'tzpana'n cyoquipyajpapø'is costumbre va'cø syeña'øyaj vyin; porque nø cyu'tupøji'n, ja syeña'øyajøpøte.

13 Entonces eyapø va'njajmoyajpapø Israel pøn tzu'nyajque'tu, como Pedro'is chøjcuse, aunque myusyaju que muspana'n cyu'tyaj nø cyu'tyajupøji'n. Hasta Bernabé jetse tzu'ngue't jetji'n ji'n vyøjpø qui'psocuyji'n.

14 Pero cuando "isøjtzi que ji'na'n chøcyaj vøjpø ote viyun'sye, entonces øtz "nøja'yøjtzi Pedro mumu tu'myajupø'is vyi'nañdøjqui: "Mitz mi Israel pønete, pero mi ndzøcpa como ji'ndyet Israel pø'nis chøcyajpase. Ji'n mi 'yaj coput Israel pø'nis cyostumbreta'm. Entonces ¿ti'ajcuy sunba mi mbenatzøcyaj aunque jutzpø pøn lo que ji'ndyet Israel pøn va'cø yaj coputyaj Israel pø'nis cyostumbreta'm?"

Israel pøn cotzocyajpa vya'njajmocupit

15 Viyun'se tø øtz Israel pønda'mete porque jetseti pø'najta'ngue'tu como Israel pønse. Tø øtz ja it ndø coja como aunque ipø pø'nis ñe'se.

16 Pero ndø mustamba que ji'n tø vyø'om puti Diosis vyi'nañdøjqui ndø ne' ndø tzøquiji'n aunque ndø yaj copujtajo'pa Moisesis 'yangui'mguy; sino vø'om tø putpa o'ca ndø va'njamdba Jesucristo. Jetcøtoya ndø va'njamdba Jesucristo va'cø vyøjom tø pujtamø porque ndø va'njamdba ançø Cristo, y ji'ndyet porque ndø yaj copujtapyä ançø Moisesis 'yangui'mguy. Porque ni i ja it yaj copujtapyä'is Moisesis 'yangui'mguy va'cø jetse vyøjom putø Diosis vyi'nañdøjqui.

17 Pero tø øtz o'ca sunba pujtam vyøjom Diosis vyi'nañdøjqui Cristoji'nñ, y quejpa que todavía øtz cojatzøqui tø pønda'metque't; ji'ndyet Cristo'is tø tzi'pa qui'psocuy va'cø tø cojapa'tø. Pues Cristo'is ni jujche ji'n jetsepø qui'psocuy tø tzi'tamø.

18 En cambio ndø ne'c ndø tzøcpa ndø coja o'ca ndø ndzacpa ji'n vyøjpø costumbre, y jøsi'cam minba ndø vøco pøjcøchongue'te.

19 Como ja mus ndzøjcay Moisesis 'yangui'mguy, entonces ja ngui'psøjtzi ø'ca mañba cotzoc jetse, y por eso ca'use tzø'yø angui'mgu'is ñøyicøsi; pero en cambio quenbat'i'tzi Diosis ñøyicøsi.

20 Como si fuera tumø ma'møtyøjøjtzi cruzcøs Cristoji'nñ va'cø ca'ø, pero quenbat'i'tzi. Pero ji'ndyet øtz quene yøti, sino Cristo quenba ø ndzoco'yomo. Y yøti mientras nascøspø pønse ijtøjtzi, va'njambøjtzi Diosis 'Yune va'cø cotzo'nø. Je'is sungo'nøjtzi y chi'ocuyaj vyin va'cø coca'øjtzi.

21 Ji'nø suni va'cø jana ndø tzi' cuenta ti chøc Diosis tø øtzcøtoya ñe'c vyø'ajcupit. Porque o'ca vyøjomna'nñ tø putpa angui'mguy va'cø ndø yaj coputø, comequectina'nñ ca' Cristo.

3

Tiene que va'cø ndø va'njam Cristo porque ja ndø yaj coput angui'mguy

1 Mi "jyovinda'mbøte Galacia pønda'm. ¿I'is mi 'yangøma'cøtyamu va'cø jana mi ngøma'nøtyam viyunñbø tiyø? Mi vi'nañdøjquita'm ndza'mañvajcøjtzi suñi jujche ma'møtyøjuse Jesucristo cruzcøsi, va'cø mi mustam suñi si fuera mi ne'c mi istamuse.

² Yøndite su'nbøjtzi va'cø mi ndø tzajmatyamø:
 ¿Será que mi mbøjcøchoñdamu Espíritu Santo
 porque mi "yaj copujtamu ançø angui'mguy? Pero
 ji'ndyet jetse. Sino mi mbøjcøchoñdamu Espiritu
 Santo porque mi ngøma'nøndyamu ançø vøjpø ote
 y mi va'njamdamu.

³ Mi "jyovinda'mbøte. Como Espiritu Santo'is mi
 ngyotzonñdamu va'cø mi va'njammoncho'tztamø,
 entonces ¿jutznømø muspa mi yac ta'nbø' mi
 va'njammonguy mi ne'ngø nascøspø qui'psocuji'n?

⁴ ¿Será que comequecti mi istam toya sone ticøsi?
 Ojalá ji'n comequec.

⁵ Diosis mi ñchi'tamba Espiritu Santo y chøcpa mi-
 lagro'ajcuy mi "vi'nañdøjquita'm. Tzi'tam cuenta
 o'ca jetse chøcpa porque mi "yaj copujtamba ançø
 angui'mguy, o si no porque mi va'njamdamäba
 ançø vøjpø ote mi ngøma'nøtyambapø.

⁶ Jetsetina'n Abrahamgue't; Abraha'mis
 vya'njam Dios y por eso Dios nømu: "Abraham
 vøj pujtu ø vi'nañdøjqui porque vanja'mbøjtzi".

⁷ Jetcøtoya mustamø que Abraham
 va'njamoyajpapø pø'nis pyeca jata tzu'nguyete.

⁸ Y it Diosis 'yote jachø'yupø que vi'na o chamdøji
 que Diosis manba pyøjcøchonyaje aunque iyø
 aunque ji'ndyet Israel pøn o'ca vya'njamayajpa
 Dios. Jetseti Diosis vi'na o chajmay vøjpø ote
 Abraham, nømu: "Porque mitz øtz ma'nbø ndzi'
 yajya'mocuy, y jetcøtoya mumu nascøsta'mbø pønis
 manba pyøjcøchonyaj yajya'mocuy".

⁹ Jetse Abraha'mis vya'njam Dios y Diosis
 jetseti chi'yajque'tpa yajya'mocuy mumu
 vya'njamayajpapø'is ñe'cø.

10 Pero momu pøn cyomo'pyapø'is que mañba yaj copujtay 'yangui'mguy, jet tocoyajupøte Diosis vyi'nañdøjqui. Porque yøcse it Diosis 'yote jachø'yuse: “Tocoyupøte Diosis vyi'nañdøjqui momu ji'n yaj copujtayepø'is ijtuse jachø'yupø angui'mguy libru'omo”.

11 Pero ndø mustamba que ni i ji'n ma pyøjcøchoñ Diosis porque yaj coputpa añcø angui'mguy, porque jachø'yupøte: “Pøn Diosis pyøjcøchoñu mañba quene porque vya'njamba”.

12 Pero muspa ndø cøme'tza jujche muspa ndø yaj coput Moisesis 'yangui'mguy aunque ji'n ndø va'njamdam Dios. Porque angui'mguy nømba: “Yaj copujtapyapø'is angui'mguy mañba quene porque chøcpa añcø ijtuse angui'mguy”.

13 Entonces aunque ja ndø yaj coput angui'mguy, Cristo'is tø yaj cotzocu va'cø jana tø yaj coja'ajtøjø. Ñe'c Cristo yaj coja'ajtøju tø øtzcøtoya, ja tyoya'nøtyøjø. Como it jachø'yuse Diosis 'yote: “Yaj coja'ajtøjupøte aunque iyø yaj ca'tøju cucyøsi”.

14 Jesucristo cruzcøsi ma'mgatøju, va'cø mus chi'yajya'mocuy Diosis aunque iyø aunque ji'ndyet Israel pøn; mismo yajya'mocuy chi'use Abraham, jet va'cø chi'yajque't aunque iyø. Jetse tujcu va'cø mus ndø pøjcøchondam Espiritu Santo Diosis opø chame mañba tø tzi' ndø va'njamdamu añcø.

Diosis vi'na chøc compromiso y jøsi'cam tzi'tø Moisesis 'yangui'mguy

15 Ø mi va'njamocuy tøvøta'm, mañba ndzam jujche ndø tzøctambase tø pø'nis. Cuando ndø tzøctamba contrato, aunque pø'nis chøcyaju, o'ca

acuerdo tzø'yajpa, ni i ji'n mus nømø que ji'n ø ndzøqui, ni ji'n mus cyojañøyø ni ti más.

16 Ahora pues Diosis chajmay Abraham ti mañba chøqui ñe'c Abrahamgøtoya y 'yunecøtoya. Jachø'yupø Diosis 'yote ji'n ñømi: "mi unenda'm", como que ityajuna'n sone 'yune, sino que nømba: "mi 'une"; como que tumdi chajmapyapø 'yune. Y jic Abraha'mis 'yune nø chamupø Diosis, Cristote.

17 Pues yø'cse nø ndzam øjtzi: Diosis chøc contrato Abrahamji'n y Cristoji'n yaj queju que viyuñ dzamu. Y cøjtu'cam cuatrocientos treinta ame chøjcumø contrato, entonces tzamdøj Moisesis 'yangui'mguy. Pero ji'n mus yaj contrato jic angui'mgu'is va'cø jana tyuc Diosis chamuse.

18 Porque o'ca ndø pøjcøchonbana'n Diosis tø tzi'papø tiyø porque angui'mguy ndø yaj coputpa añcø, entonces ji'nañ ndø pøjcøchove porque Diosis chøjcu añcø compromiso. Pero Diosis syun chi' Abraham vøjpø tiyø porque jetse chøc compromiso ñe'c Diosis.

19 Entonces ma'ñbø mi ndzajmatyame ticøtoya yospa angui'mguy. Angui'mguy jøsicam tøjcøyu va'cø tø isindzi ndø coja hasta que min "Yune" jutipøji'n chøc compromiso Diosis. Y angui'mguy angelesji'n cojtøju je'is va'cø chi'ocu'yajyajø Moisesis cyø'omo va'cø chamgøjtayaj sone pøn.

20 Pero o'ca Diosis ñe'c tø tzajmapya aunque tiyø, ji'ndyet pyena eyapø'is va'cø tø tzamgøjtayø. Y jetse Diosis chi' compromiso tyumgø'i, ni i'is ja yaj cøjtayø.

Ticøtoya Diosis cyø'vej angui'mguy

21 ¿Entonces será que Diosis cyompromiso ji'n yac valetzøqui aŋgui'mgu'is? Valetzøcpati; porque o'ca tzi'tøjuna'ñ aŋgui'mguy muspapø'is tø tzi' quenguy, entonces muspana'ñ tø put vyøjom Diosis vyi'nandøjqui o'ca jic aŋgui'mguy ndø yaj cop-utpana'ñ.

22 Pero it jachø'yuse Diosis 'yote que it mumu pø'nis cyoja y ji'n jutz nøm ndø tzac ndø coja ndø ne'ngø. Pero va'cø ndø va'njamø que ndø coja tø coca'atyamu Jesucristo'is, entonces muspa ndø pyøjcøchon Diosis tzajmayupø que manba tø tzi'i.

23 Pero cuando ja minø'ctøc hora va'cø ndø va'njam Jesucristo, entonces Diosis 'yangui'mgu'is tø nø'ijtamü como somdøjuse. Ijtuna'ñ ndø coja, ni tina'ñ ji'n mus ndø tzøctamø hasta que minu Cristo, ñe'c va'cø ndø va'njamdamø.

24 Jetse pues como cuendatzøcpapø'is ñømaŋba une escuela'omo, jetse Diosis tø coquendambana'ñ aŋgui'mgu'is ñøyicøsi como unese, hasta que tø nønu'ctam Cristocø'mø. Entonces ndø va'njamdamba que ñe'c Cristo'is vyøjom tø nøpujtamba Diosis vyi'nandøjqui.

25 Pero como yøti ndø va'njamdamba Cristo, ji'nam jetse tø coquendandøji aŋgui'mgu'is ñøyicøsi.

26 Porque mumu tø øjtzi Diosis tø 'yuneta'm porque ndø va'njamdamba Cristo Jesús.

27 Porque mumu tø øtzta'm o'ca tø ñø'yøtyamu'am como seña que tø tyumøtzøctam Cristoji'ñ, y entonces como si fuera je'is tyucu ndø mesaytambase, jetse ndø pøjcøchondamba je'is qui'psocuy.

28 Yøti ni ti ji'n chøqui aunque Israel pøn, aunque griego pøn; aunque o'ca obligado nø yosupø,

aunque ñe'c gyustopit nø yosupø, aunque pøn, aunque yomo, porque parejo tumbø tzocoy mi nø ijtaba Cristo Jesusj'n.

²⁹ Y como Cristo'ise mi ñe'nda'm, entonces Abraha'mis mi 'yuneta'mete; y mañba mi mbøjcøchondame yajya'mocuy Diosis cyomprometetzøjcuse va'cø chi' Abraham.

4

¹ Pero nø'mbøjtzi que tum une mañbapø'is ñøtzø'yay jyata'is interés, mientras nømdøc myøja'aju'cse'nomo, como coyospa pønse angui'mdøjpa, aunque aunque ticøsi jete vø'ne.

² Y iju cuendatzøcyajpapø'is y iju 'yangui'myajpapø'is hasta que ta'nba jutzø ame chajmayuse jyata'is.

³ Jetseti øtzta'mgue't, como che'pø une anmacho'chajpase nascøspø anma'yocuji'n, jetse tø øtz tø ijtabana'n angui'mgu'yomo, tø angui'mdzo'tztandøju.

⁴ Pero cuando nu'c 'yora, Diosis cyø'vej ñe' 'Yune, yac pø'naj yomocøsi, pø'naj va'cø chøc Israel pønis yangui'mguy.

⁵ Minu va'cø tø yac libretzøctamø Moisesis 'yangui'mgu'yomo tø ijtamupø, para va'cø tø pøjcøchondam Diosis come ñe' 'yunese.

⁶ Entonces porque je'is mi 'yuneta'm, Diosis cyø'vej 'Yune'is 'Yespiritu mi ndzoco'yomoda'm y Espiritu'is mi yac onba. Mi ñømba: “¡Ay, øjtze mi Janda!”

⁷ Por eso ji'name mi ñgyoyosepø, sino Diosise mi 'yune. Y como Diosis mi 'yune, entonces mañba mi mbøjcøchon Diosis ñe Cristoji'n.

*Pablo'is cyømaya'yajpa Galacia nasom
vya'njamayajpapø'is Cristo*

⁸ Pero vi'na cuando ji'ndøcna'ñ mi ngomustam Dios, obligado mi va'njamdamu comi chøquita'm lo que de por si na ji'ndyet Dios.

⁹ Pero yøti mi ngomustamba'am Dios, o más vøjø va'cø tø nømø que Diosis mi ngyomustamba mijtzi. Entonces ¿ti'ajcuy mi vindu'tangue'tpa jic mochipø va'njamocucyø'mø ji'n musipø'is tø yaj cotzoca? Jic va'njamocucyø'mø por obligadotimete mi ndzøctambana'ñ costumbre.

¹⁰ Y yøti nømdøc mi ngo'anjamdamu jama, y poya, y aŋsøn, y ame.

¹¹ Ngona'tzpøjtzi uytim suniti o ndzamgøpucs vøjpø ote mitzji'ñda'm.

¹² Ø mi va'njamonguy tøvø, mi va'ngatya'mbøjtzi mbasencia'ajcutya'm va'cø mi ndø tzøjcopujtøtyamø. Porque øtz ndzajcø ø ngostumbre va'cø mbøjcøchojnay mi ne'nda'm. Ni ti ja mi ndø tzøjcatyamø.

¹³ Pero mi mustamba que porque ca'ena'ñøjtzi, por eso nu'cø mitzcø'mda'm va'cø mi ndzamgøpucsatyam vøjpø ote.

¹⁴ Y tiene quena'ñ va'cø ndona je ca'cuy øjtzi. Pero ja mi ndø menoschøctamø, ni ja mi ndø conoxtamø, sino mi ndø pøjcøchoñdamuti como si fuera Diosis 'yanjeles mi mbøjcøchoñdamuse, como Cristo Jesús mi mbøjcøchondamuse.

¹⁵ Vøtina'ñ mi ngyasøtyamu jicsye'c: ¿ti'ajcuy ji'n jetse mi ngyasøtyame yøti? Muspa ndzam que vøti mi ndø yac yamdamu, sunbana'ñ mi ndø tzi'tam más vøjpø tiyø, como si fuera sununa'ñ mi ndø tzi'tam mi vindøm o'ca muspana'ñ mi nømbujtamø.

16 ¿Será que yøti nø mi ndø ngui'satyamu porque viyuñsyepø tiyø nø mi ndzajmatyamu?

17 Jic eyapø pø'nis vøti mi syundamba, pero ji'ndyet vøjpø qui'psocuji'n. Sino que ji'qui'is syuñajpa va'cø mi ndø tzacta'møjtzi y va'cø mi sundam jicta'm.

18 Viyuñsy'e vøjø va'cø ndø suñaj ndø tovø, pero vøjpø qui'psocuji'n. Jetse vøjø va'cø mi ndzøctamø mumu jama aunque ja itø'c øtz jeni mitzji'nda'm.

19 Ø mi unenda'm mijtzi, toya'ispase yomo cuando mañba is une, jetse øtz vøcotoya'isque'tpøjtzi mitzcøtoya. Aunque øtz is toya, su'nbø mi yac nø'ijtay Cristo'is qui'psocuy.

20 Øtz sunbana'n it mitzji'nda'm yøti, va'cø mus mi o'nøndyam eyati, porque ji'n ø mus ti muspa ndzøcø va'cø mi yac va'ñajjmø ti ndza'mbøjtzi.

Sara y Agar

21 Mijtzi syunbapø mi ndzøctam Moisesis 'yangui'mguy, a ver o'ca mi ngønøctøyøtyamba viyuñse jujche nømbase angui'mguy.

22 Porque jachø'yupøte que Abraha'mis oy metzcuy 'yune, tum oy cyoyomocøsi y tum oy co'tøc yomocøsi.

23 Cyoyomocøsi pø'najupø, como mumu jama pyø'najnømbase, jetseti pø'naju. Pero co'tøc yomo'is 'yune milagropø min pø'naje Diosis chajmayuse que mañba it 'yune.

24 Jic historia anma'yocuyete. Como ijtu metzcuy yomo, itque'tuti metzcuy contrato. Je coyomo Agar es como je contrato tzi'tøju Sinaí

cotzøjcøsi. Jic contratocø'mø ityajupø'is por obligadoti chøcyajpa aŋui'mguy, ji'ndame por gusto chøcyajepø.

25 Pues como Agajris por obligadoti o yosay Abraham, jetseti Sinaí cotzøjcøsi Arabia nasomo tzitøj aŋui'mguy, por obligadoti va'cø chøcyajque'ta. Y jetsetique't yøti Jerusalén gumgu'yomda'mbø'is por obligadoti chøcyajque'tpa aŋui'mguy.

26 Pero møjipø Jerusale'nomda'mbø gyustopit yosyajpapø, ji'nam yosyaj por obligado, y øtz jic cumgu'istimete tø 'yuneta'm.

27 Porque jachø'yupøte Diosis 'yote:
Casøyø mi yomo'is ji'n mi 'yune'øyimbø'is;
alegre veja mijtzi mi yomo'is nunca ja mus mi yac
pø'naj une.

Porque aunque mi nchajcu mi "jaya'is, y ni ipø
pø'nis ja mi nø'indø, más vøti manøba it mi
"une que ji'n ijtpø'is jyaya.

28 Jetse pues ø mi va'ŋjamonguy tøvøta'm,
como pø'najuse Abraha'mis 'yune Isaac Diosis
chajmayuse, jetseti tø øtz tø Diosis 'yuneta'mgue't
como chamuse Diosis.

29 Pero como tujcuse jic tiempo, jetseti yøti tu-
jque'tpa. Porque jicsye'c pøn pø'najupø mumu
jama tø pø'najpase, je'is yacsutzøjcu pøn pø'najupø
Diosis 'Yespiritu'is pyømiji'n; y hasta como yøti
jetseti chøcyajque'tpa.

30 Pero yø'cse it jachø'yuse Diosis 'yote: "Macput
cyoyomo 'yuneji'n, porque ji'n ma pyøjcøchojnay
ni ti erejencha cyoyomo'is 'yune'is; sino co'tøc
yomo'is 'yune'is manøba pyøjcøchojnay erejencha".

³¹ Jetseti tø øjtzi ø mi ndøvøta'm, tø øtz ji'ndyet como si fuera coyomo'is tø 'yunese, sino tø øjtzi como si fuera co'tøc yomo'is tø 'yunese.

5

Hay que librepor pønse va'cø tø ijtamø

¹ Entonces como Cristo'is tø yac tzø'ytam libre va'cø ndø tzøc ndø ngustopit Diosis syunbase; por eso jetse sequitzøctamø va'cø mi ijtam libre. U'yam mi vindu'tam como mi ijtamusena'ñ vi'na cuando por obligado mi ndzøctambana'ñ Moisesis 'yanguí'mguy.

² Tø cøma'nøtyamø; øjchøñ Pablo, yøcse nø mi ndzajmatyamu yøti: O'ca mi yac seña'øtyandøjpa mi "vin Israel pø'nis syeñaji'ñ, entonces Cristo'is chøjcuse mitzcøtoyata'm, ji'n mi yac valetzøctame ni jujche.

³ Mi ndzamvøjøtzøjcatya'mbøjtzi mi syeña'øtyandøju'is mumu mitzta'm que it pyena va'cø mi yaj coputpø'jatyamø ijtuse Moisesis 'yanguí'mguy mumu.

⁴ O'ca mi ngomo'pya o'ca mañbase mi yaj copujtay Moisesis yanguí'mguy va'cø vyø'om mi mbyuti Diosis vyi'nañdøjqui, entonces tzø'pya como ni ti ji'n yoscusye Cristo'is chøjcuse mitzcøtoya, y ji'n mus mi mbøjcøchon lo que chøjcuse Diosis mitzcotoya ñe vyø'ajcupit.

⁵ Pero tø øjtzi tø cotzonðamba Espiritu Santo'is va'cø ndø mustamø y va'cø ndø "jo'ctamø que vyøjom mañba tø pujtame porque tø nømba mañba tø yaj cotzoc Jesucristo'is.

6 Porque o'ca Jesucristoji'n tø ijtu, o'ca tø seña'øtyøju Israel pø'nis syeñaji'n, ji'ndyet ni tiyø; y o'ca ja tø syeña'øtyøjø, también ji'ndyet ni tiyø. Pero it pyena va'cø ndø va'njajmø que Cristo'is tø yaj cotzocpa. Y o'ca jetse ndø va'njamdamba viyuñsye, entonces nay tø sundandøjque'tpa.

7 Vøjco'niti nømna'n mi ndyu'ñajtamu Diosis tyu'ñomo. ¿l'is mi ya'inductamu va'cø jana mi ngøma'nøtyam viyuñbø tiyø?

8 Pues mi ya'inductambapø'is ji'ndyet mi "vyejandyamupø'is chi'yajuse qui'psocuy.

9 Como usy levadura'is ñøpononba vøti harina ma'tze, jetse tumbø pø'nis chøctocopyø'pa mumu pøn.

10 Pues øtz ni'anja'mbøjtzi ndø Comi'is tø cotzonðambase que ji'n ma mi ngui'pstam eya. Pero jic nø mi nchøctocotyambapø'is, manbatí cyo'angøyi; ji'n importatzøqui ipø pønete.

11 Ø mi va'njajmonguy tøvøta'm, o'ca ndza-mgøpucspatøcna'ntzi va'cø tø seña'øtyandøjø, entonces ji'na'ñø yacsutzøc ni i'is. Pero øtz ndza-mgøpucspa que ji'ndyet pyena va'cø tø seña'øtyøjø, porque Cristo ca' cruzcøsi øtzcøtoya y sobrat jetse; por eso qui'sayajpøjtzi.

12 Pero jic nø mi jyorvatzøctambapø'is eyapø va'njajmocucøtoya como sunba vyøcyaj vyin va'cø syeña'øyajø, ¿ti'ajcuy ji'n vyøc jacpø'yaj vyin vøti?

13 Porque mijtzi ø mi ndøvøta'm, Diosis mi vyejandyamu va'cø mus mi ndzøctam mi sunbase, pero u mi ngui'psu o'ca muspa mi ndzøctam yatzipø tiyø mi sisis syunbase, sino va'cø mi na ngotzonðandøjø porque mi na syundandøjpa.

¹⁴ Porque mumu ijtuse angui'mguy mi "yaj cop-utpa o'ca mi ndzøcpa chambase yøn angui'mgu'is: "Jujche mi "vin mi sunbase, jetse sun mi ndøvø".

¹⁵ Pero o'ca mi ngui'pstamba como si fuera mi na ngø'standøjpase, tzøctam cuenta jana mi na "vicpø'tandøjø.

Syunbapø sisis eyapøtite, syunbapø Espiritu Santo'is eyapøtite

¹⁶ Yøcse nø'mbøjtzi: tzøctamø syunbase Espiritu Santo'is y jetse ji'n ma mi ndzøc yatzipø tiyø mi sisis syunbase.

¹⁷ Porque ndø sisis syunbase, Espiritu Santo'is ji'n syuni; y Espiritu Santo'is syunbase, ji'n syun ndø sisis. Jetse metzcuy ndø nø'itpa qui'psocuy ndø tzoco'yomo; por eso yatzipø mi ngui'psocu'is mi ya'inducpa jana mi ndzøc vøjpø tiyø sunbase mi ndzøcø.

¹⁸ Pero o'ca Espiritu Santo'is mi isindzi'pa jujche va'cø mi ndzøcø, entonces ji'ndyet pena va'cø mi ndzøc pecapø jachø'upø angui'mguy.

¹⁹ Ndø mustamba ti syunba chøc ndø sisis. Ndø sisis sunba va'cø tø cøtzøjcø'yoya, va'cø ndø mórtzi nø'it yomo, mósyanya'mbø y tococutya'mbø tiyø va'cø ndø tzøcø,

²⁰ va'cø ndø va'njam comi chøqui, va'cø ndø tzøc brujo'ajcuy, va'co nay tø qui'satyandøjø, va'cø ndø ngøpo' qui'pcuy, va'cø ndø ansujnay ti ñø'it ndø tøvø'is, va'cø tø manøba qui'syca'ø, na's vingøtoya va'cø ndø metz vøjpø tiyø, quiccupit va'cø tø ve'na, va'cø ndø anømay ji'n vyøjpø anøma'yocuji'ñ,

²¹ va'cø ndø qui'say ndø tøvø porque je'is ñø'ijtu anøcø aunque tiyø, va'cø tø yaj ca'oya, va'cø tø no'ta,

va'cø tø vejangøtø nø tø no'tu'øc; va'cø ndø tzøc jetseta'mbø tiyø, jetemete yatzipø tiyø syunbase ndø sisis. Oyu'am mi ndzajmatyame y yøti nø mi ndzam vøjø tzøjcatyangu'e'tu, que jetseta'mbø ti chøcyajpapø'is ji'n ma pyøjcøchonyaj ni tiyø Diosis itcu'yomo.

22 Pero Espiritu Santo'is tø tzi'pa qui'psocuy va'cø nay tø sundandøjø, va'ca tø casøyø, va'cø tø it contento, va'cø ndø nømanjaj vøti hora pasencia ndø tøvø, va'cø ndø toy'a'ñøy ndø tøvø; va'cø tø it como vøjpø pønse, suñi va'cø tø

23 humildepø pønse va'cø tø itø, va'cø ndø ya'induc ndø vin. Ja it ni ti aŋgui'mguy va'cø jana ndø tzøc jetseta'mbø tiyø.

24 Y tø øjtzi Cristo'is tø ñe'ta'm ndø nø'ijtamba qui'psocuy como si fuera ndø sis ca'u'am cruzcøsi, y como ca'upø'is ji'n syun ni tiyø, jetse ji'ndam ndø que'ñøyi ni ti yatzipø.

25 Pero como Espiritu Santo'is tø tzi'tamba quen-guy; tiene que va'cø ndø tzøctamø Espiritu Santo'is tø tzi'tambase qui'psocuy.

26 Ji'n mus ndø møja'ngotzøc ndø vin, porque jetse nay tø tzojqui'syca'tandøjpa y nay tø aŋsujnatyandøjpa.

6

Va'cø nay tø nøcotzonjandøjø

1 Ø mi ndøvøta'm, o'ca aunque iyø mijtzomda'm quecpa coja'omo y cojapa'tpa, entonces ñø'ijtu'is qui'psocuy Espiritu Santo'is chi'pase, je'is muspa cyotzonyaj quejcupø pøn va'cø qui'psvitu'que'ta;

pero humildepø qui'psocuji'n; pero va'cø cuendatzøc vyin jana cye'c ñe'cø.

² Nay mi ngotzondandøjø cuando ji'n vyøjpø qui'psocu'is mi myolestatzøcpa como si fuera ja vyø'ajuse tzømi; y jetse mi "yaj copujtamba Cristo'is 'yangui'mguy.

³ Porque o'ca i'is como ijta'nøyuse cyomo'pya vyin aunque ni ti ji'n yoscuy, entonce ñe'ctit 'yangøma'cøpya vyin.

⁴ Pero tumdum pø'nis tiene que va'cø chi' cuenta o'ca vøj nø chøjcu. Entonces o'ca ni'anjamba o'ca vøj nø chøjcu, contento mañba iti porque vøjti nø chøc ñe'cø, y va'cø jana cuentatzøc eyapø o'ca más vøj nø chøc ñe'cø que ji'n je'is nø chøjcuse.

⁵ Porque tumdum pøn tiene que va'cø 'yañdzo'nøyajø ñe'c chøcyajuse.

⁶ O'ca pøn nø 'yañmatyøju Diosis 'yoteji'n; entonces tiene que va'cø vye'ndzi añma'yopyapø vene'c ñø'ijtupø.

⁷ U mi yac angøma'cøtyandøj mi "vin. Dios ji'n mus ndø angøma'cøyø. Lo que ti ñijpa pø'nis, jet mañba cyosechatzøjque'te.

⁸ Como ndø cosechatzøcpase ndø nijpupø, jetse chøcpapø'is ji'n vyøjpø tiyø syisis syunbase, ñe' chøquipit mañba pyøjchøchon ji'n vyøjpø tiyø como si fuera cosechase. Mientras chøcpapø'is Espiritu Santo'is syunbase, je'is mañba pyøjcøchon Espiritu Santocøsi ji'n yajepø quenguy como cosechase.

⁹ Por eso uy ndø nindu'yaye va'cø ndø tzøc vøjpø, porque o'ca ji'n ndø nindu'yaye, cuando nu'cpa hora, mañba ndø pøjcøchondam vøjpø tiyø como cosechase.

¹⁰ Jetse pues cuando ndø nø'ijtu'c tiji'n va'cø ndø cotzoñ aunque iyø, muspa ndø cotzova; y más vøjø va'cø ndø cotzoñ ndø va'njajmønguy tøvø.

Ultimopø cha'manvajcocuy y dyuschi'ocuy

¹¹ Istamø jujche møjata'mbø letra nø ndzøjcu ø ne' ngø'ji'n va'cø mi "jajyandyamø.

¹² Jic syuñajpapø'is va'cø mi syeña'øtyandøjø, jetse syuñajpa ñe'c va'cø chø'yaj vøjø pønji'n. Ji'n syun va'cø yacsutzøcyajtøjø nø 'yañmayaju ancø que Cristo'is tø coca'tam cruzcøsi y sobrat na's jetse va'cø ndø va'njajmø. Porque o'ca anmayajpana'n que Cristo'is tø coca'tam cruzcøsi, mañbana'n qui'sayajtøji.

¹³ Pero jejta'm comequecti seña'øyajpa vyin; porque na ji'ndyet yaj coputyaj ijtuse angui'mguy. Pero syunyajpa va'cø mi yac seña'øtyamø va'cø mus møja'ngotzøcyaj vyin porque mitz mi yac va'njamayaj ñe'c 'yañma'yocuy.

¹⁴ Pero øtz nunca ji'n møja'nomgotzøc ø "vin ni ticøsi. Na's porque ndø Comí Jesucristo'is yac ya'møjtzi hasta coca'ay ø ngoja cruzcøsi, jetcøs øtz møja'ngotzøcpa ø "vin. Y por Cristopit ca'upø tise ngomo'pyøjtzi nascøstambø tiyø va'cø jana ansunø; y nascøsta'mbø'is como'yajpøjtzi como ca'upø pønse, ji'n ø suñaje.

¹⁵ Porque o'ca tø yaj cotzoctamu Jesucristo'is, entonces o'ca tø seña'øtyandøju, o'ca ja tyø seña'øtyandøjø, ni ti ji'n chøqui; sino va'cø tø jyome vitu'ø, jet más syunba.

¹⁶ Pues mumu mi ndzøctambapø'is yøn anma'yocuy, mitzta'm viyuñsyepø mi Israel

pønda'm Diosise mi ñe'tam, su'nbøjtzi va'cø mi yac
ijtam contento Diosis y va'cø mi ndyoya'nøtyamø.

¹⁷ Desde yøti u mi ndø molestatzøctamø, porque
ø ngonñacøsi ityajupø ø sas, jet señate que øtz ndø
Comi Jesucristo'is chon cyoyospa.

¹⁸ Ø mi ndøvøta'm, o'nømbyøjtzi Dios mas vøti
va'cø mi ngyotzondam mi ndzoco'yomo ndø Comi
Jesucristo'is. Amén.

**Jomepø Testamento
New Testament in Zoque, Francisco León
(MX:zos:Zoque, Francisco León)**

copyright © 1978 Wycliffe Bible Translators, Inc.

Language: Zoque, Francisco León

Translation by: Wycliffe Bible Translators, Inc.

Zoque, Francisco León [zos], Mexico

Copyright Information

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zoque, Francisco León

© 1978, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

eb9c480f-7850-5058-8cf9-fa7a36b93da9